

Fabrika cementa Lukavac izgrađena je 1974. godine, a projektovani kapacitet proizvodnje od 340.000 tona cementa postignut je dvije godine kasnije. Kontinuirani proizvodni proces trajao je sve do aprila 1992. kada je zbog ratnih dejstava došlo do prekida u kontinuitetu. U oktobru 2001. fabrika prelazi u vlasništvo austrijske poslovne grupacije Asamer Baustoffe AG, a kada i započinje svoj preporod.

Danas ova fabrika slovi za najvećeg proizvođača cementa u Bosni i Hercegovini sa godišnjom proizvodnjom većom od 800.000 tona cementa i 600.000 tona klinkera.

“Izuzetno smo ponosni što smo dio ugledne grupacije Asamer koja je donijela tehnološki napredak fabrike te uvela moderne standarde poslovanja. Od Fabrike cementa Lukavac napravila je jednu od najmodernijih i ekološki najprihvatljivijih fabrika u Evropi. Također, privatizacija je doprinijela privrednom razvoju Lukavca i tuzlanske regije”, kazao je na početku razgovora za Klix.ba direktor Fabrike cementa Lukavac Izet Imamović.

Nezamisliv poslovni i ekološki preporod

Fabrika je 2001. godine zatečena u tehnološki zastarjelom stanju te su shodno tome bila potrebna velika ulaganja u modernizaciju procesa proizvodnje sa posebnom pažnjom na zaštitu okoliša.

“Nakon privatizacije, uradili smo dvije velike faze izgradnje i rekonstrukcije u koje je investirano više od 200 miliona KM. Fabrika je modernizirana te je dostigla nezamisliv poslovni i ekološki preporod. Fabrika trenutno dostiže dva i po puta veći kapacitet proizvodnje od onog prije privatizacije. Sada je u stanju proizvesti više od 800.000 tona cementa i 600.000 tona klinkera na godinu”, ističe Imamović.

Ova fabrika prva je u BiH počela koristiti alternativna goriva od otpada visoke kalorične vrijednosti nastalog iz domaćinstava, industrije i drugih djelatnosti. To doprinosi očuvanju neobnovljivih izvora energije, zatim smanjenju troškova proizvodnje za industriju, ali i očuvanju okoline kroz trajno rješavanje otpada.

“Fabrika ide u korak sa svjetskim standardima kada je u pitanju korištenje alternativnih goriva. Dozvolu za korištenje zamjenskih goriva od Federalnog ministarstva za zaštitu okoliša i turizma dobila je 2012. te je postala prva kompanija u BiH koja koristi alternativna goriva. Trenutno učešće alternativnih goriva u proizvodnji iznosi 30 posto i namjera nam je u narednim godinama povećati ovaj iznos. Korištenje alternativnih goriva u Evropi i svijetu sasvim je normalna stvar i stepen iskorištenosti ide i do 100 posto”, dodaje direktor Fabrike cementa Lukavac.

Inače, rezultati mjerenja koja je ova kompanija provela prošle godine pokazali su da su vrijednosti emisija predviđenih polutanata u skladu sa strogim standardima Evropske unije i ispod zakonom predviđenih vrijednosti.

Fabrika trenutno ima dozvolu za suspaljivanje korištenih guma i ulja, otpada iz kožarske i tekstilne industrije, istrošene filtracijske gline i miješanog mljevenog otpada, alternativnih sirovina te goriva nastalog iz otpada.

U proizvodnom procesu isključivo domaće sirovine

Cement ove fabrike u potpunosti je domaći proizvod, s obzirom da se u proizvodnom procesu koriste isključivo domaće sirovine, a uspješna saradnja ostvarena je i sa velikim brojem bh. kompanija.

“Zajedno sa lokalnim partnerom posjedujemo vlastiti kamenolom krečnjaka Vijenac, koristimo pepeo i šljaku iz Termoelektrane Tuzla, prirodni gips kupujemo u Srednjoj Bosni, ambalažu za pakovanje kupujemo u Maglaju, a sve usluge dovoza sirovine u fabriku te otpremu gotovog proizvoda kupcu vrše lokalne transportne firme”, naglašava naš sagovornik.

Dodaje da je imperativ poslovanja ove fabrike proizvodnja cementa u ekološki zdravom okruženju.

“Od dosadašnje ukupno realizovane investicije, petina sredstava je izdvojena za opremu koja omogućava proizvodnju po najvišim ekološkim standardima. Redovno mjerimo kvalitet zraka i emisije iz naših dimnjaka. U novu proizvodnu liniju ugrađeni su vrećasti filteri koji u zrak ispuštaju tek 10 miligrama prašine po metru kubnom zraka. A to je pet puta ekološki prihvatljivije od normi koje propisuju stroga pravila Evropske unije. Zaista se trudimo ispoštovati sve ekološke standarde kako bi svi mi živjeli u boljoj i čistijoj sredini”, nastavlja Imamović.

Ova fabrika danas upošljava više od 200 radnika, a angažman novih sedam planiran je do kraja ove godine.

“Već godinama smo jedan od najpoželjnijih poslodavaca u našoj zemlji. Trudimo se da imamo zdrav odnos prema svojim uposlenicima u čije usavršavanje konstantno ulažemo. U prošloj godini uposlili smo 12 novih radnika, od čega šest visokoobrazovanih. Do kraja ove godine planiramo uposliti još njih sedam”, kaže naš sagovornik.

Kada je u pitanju izvoz, Imamović kaže da je ekonomska kriza iz 2008. godine izazvala krah građevinskog sektora, a time snažno pogodila i industriju građevinskih materijala.

Cemenatre, kako u našoj zemlji, tako i u regionu rade skoro polovinom svojih proizvodnih kapaciteta. Zbog smanjene potražnje na svim regionalnim tržištima te viškom proizvodnih kapaciteta svih tvornica, Imamović ističe da ne preostaje puno prostora za izvoz te ga ova fabrika realizuje na jako simboličnom nivou.

Investicije od 10 miliona eura

Što se tiče investicija za naredni period, sagovornik portala Klix.ba naglašava da je do 2018.

godine u planu ulaganje od oko 10 miliona eura u proizvodnju i zaštitu okoliša, podizanje kvalitete zraka i kvaliteta radne sredine, a što će svakako doprinijeti i novim upošljavanjima. "Ove godine obilježavamo 15 godina od uspješne privatizacije i u planu smo ovaj jubilej obilježiti kako i dolikuje. U saradnji s lokalnim vlastima, s kojima imamo odličnu saradnju, organizirat ćemo brojne aktivnosti povodom ovog značajnog datuma, a ideja nam je da u oktobru u Lukavac dovedemo i našeg vlasnika kako bi uveličali ovaj jubilej i odali mu priznanje za uspjeh fabrike", dodaje Imamović.

Kao i svaka druga, i ova bh. fabrika se suočava sa određenim problemima. Jedan od njih je duga i komplikovana administrativna procedura prilikom dobijanja određenih dozvola, posebno urbanističkih i građevinskih.

Imamović kaže da ovi postupci traju i po nekoliko mjeseci, a što usporava procese investiranja na koja su spremni.

Iz Fabrike cementa Lukavac na kraju ističu da bi voljeli kada bi u ovom segmentu imali veću podršku i razumijevanje vlasti.

izvor: biznis.ba